

CONVENIO DE COLABORACION ENTRE A VICEPRESIDENCIA E CONSELLERIA DE PRESIDENCIA, ADMINISTRACIÓN PÚBLICAS E XUSTIZA, A CONSELLERIA DE SANIDADE, O SERVIZO GALEGO DE SAÚDE, E A FEDERACIÓN GALEGA DE MUNICIPIOS E PROVINCIAS (FEGAMP), PARA A REALIZACIÓN DE PROGRAMAS DE ATENCIÓN E PROTECCIÓN DA SAÚDE.

Santiago de Compostela, 20 de Setembro de 2018.

REUNIDOS

Dunha parte os Sres. D. Alfonso Rueda Valenzuela, vicepresidente e conselleiro de Presidencia, Administracións Públicas e Xustiza e D. Jesús Vázquez Almuíña, conselleiro de Sanidade e presidente do Servizo Galego de Saúde, a teor do disposto no artigo 34 da Lei 1/1983, do 22 de febreiro.

Doutra parte D. Alfredo L. García Rodríguez, presidente da Federación Galega de Municipios e Provincias (CIF) que actúa en nome e representación daquela, segundo prevén os seus estatutos.

Todos os intervinientes actúan coa representación que legal e regulamentariamente teñen conferida e

EXPOÑEN

I.- O Decreto 74/2018, de 5 de xullo, regula a estrutura orgánica da Vicepresidencia e Consellería de Presidencia, Administracións Públicas e Xustiza como o departamento da Xunta de Galicia ao que lle corresponde, sen prexuízo das demais competencias que legal e regulamentariamente teña atribuídas, a elaboración, proposta e execución da política do Goberno Galego en materia de Administración local.

II.- O Decreto 41/2013, do 21 de febreiro, polo que se establece a estrutura orgánica da Consellería de Sanidade, determina que *esta e o órgano da* Administración autonómica responsable da superior dirección e control do desenvolvemento das funcións e competencias que corresponden Xunta de Galicia en materia de sanidade, de acordo co establecido nos artigos 27.23º, 28.8º e 33 do Estatuto de autonomía de Galicia e que lle *foron* asignadas polo Decreto 28/1980, de 15 de outubro.

O Decreto 43/2013, do 21 de febreiro, polo que se establece a estrutura orgánica do Servizo Galego de Saúde, establece que este é o organismo autónomo de natureza administrativa adscrito á Consellería de Sanidade, configurado para o axeitado desenvolvemento das competencias que no eido sanitario lle corresponden á Comunidade Autónoma de Galicia.

III.- A disposición adicional quinta, apartado 3, da Lei 7/1985, de 5 de abril, reguladora das bases do Réxime Local determina que as asociacións de entidades locais, no ámbito propio das súas funcións, poderán celebrar convenios coas distintas Administracións Públicas. Así mesmo, de conformidade co establecido no artigo 12. 2 da Lei 38/ 2003, de 17 de novembro, Xeneral de Subvencións, poderán actuar como entidades colaboradoras da Administración na xestión das subvencións da que poidan ser beneficiarias as Entidades Locais e os seus organismos dependentes.

Para estes efectos, entre os fins da FEGAMP (artigo 2 dos seus estatutos) figuran a representación e defensa das entidades locais, a promoción das competencias locais, e calquera outro fin que afecte ou incida de xeito directo ou indirecto nos seus asociados. Así, a FEGAMP poderá constituír servizos de asesoramento e asistencia para os seus membros, ou subscribir, como xa se ten dito, os acordos e convenios necesarios.

IV.- O 3/12/2014, o 11/12/2015, o 24/11/2016 e o 7/11/2017 asináronse sendos convenios coa FEGAMP como entidade colaboradora e representante única de todos os Concellos que dispoñen de servizos de atención sanitaria de trastornos adictivos

V. Para os anos 2018 e 2019, preténdese continuar a liña de colaboración coa FEGAMP, no relativo aos servizos de atención sanitaria aos trastornos adictivos, aparecendo consignada a contía correspondente a dita colaboración en 2018 nos orzamentos xerais da Comunidade Autónoma de Galicia para dito exercicio.

Por todo o anterior e, tendo en conta as razóns de interese público, social, económico e humanitario, así como a especificidade técnica que requiren os programas a desenvolver e a prioridade de darlle continuidade aos mesmos, non resulta posible promover concorrencia pública, polo que o réxime destas axudas encádrase no procedemento de concesión directa regulado nos artigos 19.4c) e 26 da Lei 9/2007, de 13 de xuño, de subvencións de Galicia.

VI.- A través do presente convenio, tentamos darlle continuidade os servizos que viñan xestionando as entidades locais no relativo a servizos de atención sanitaria aos trastornos adictivos existentes en cada un deles, o que conleva que a Comunidade Autónoma preste especial atención a este tipo de gastos, polo que se prevén especialmente no convenio a posibilidade de anticipos, de conformidade coa normativa aplicable en materia de subvencións.

Deste xeito procúrase a flexibilidade na xestión e utilización dos fondos para os fins previstos no seu conxunto.

Ademais, o mecanismo elixido busca a simplificación dos trámites administrativos e a racionalización da xestión do cumprimento dos obxectivos de desenvolvemento do propio convenio.

En base ao exposto, as partes asinan de común acordo o presente convenio, segundo as seguintes

CLÁUSULAS

Primeira.- Obxecto.

1.- O obxecto do presente convenio é regular as condicións que rexerán a relación entre a Vicepresidencia e Consellería de Presidencia, Administracións Públicas e Xustiza, a Consellería de Sanidade, o Servizo Galego de Saúde, e a FEGAMP como entidade colaboradora e os concellos que se adhiran e acepten as subvencións cuxas bases reguladoras se recollen neste convenio para o financiamento e desenvolvemento de :

Programas de axudas para Unidades asistenciais de drogodependencias (UADs), a través dos Concellos que dispoñan destas unidades, atendendo a planificación, criterios, guías, programas e procedementos establecidos polo Servizo Galego de Saúde no circuíto de asistencia sanitaria aos trastornos adictivos en Galicia publicado en 2011.

As axudas axustaranse ao disposto pola Lei 8/2008, do 10 de xullo, de saúde de Galicia e comprenderán, entre outras, as funcións de prevención, prescrición e procedementos diagnósticos

e terapéuticos, rehabilitación en pacientes con déficit funcional recuperable, a educación para a saúde no seu ámbito de actuación e a realización das prestacións sociosanitarias que correspondan en coordinación co sistema de servizos sociais.

2.- Dentro do marco de desenvolvemento do Pacto Local, o presente convenio establece as condicións que rexerán entre a Consellería de Sanidade, o Servizo Galego de Saúde e a Federación Galega de Municipios e Provincias (FEGAMP).

3.- De conformidade coa Lei 1/2016, do 18 de xaneiro, de transparencia e bo goberno de Galicia, coa Lei 19/2013, de 9 de decembro, de transparencia, acceso á información pública e bo goberno, e co previsto no Decreto 132/2006, de 27 de xullo, polo que se regulan os rexistros públicos creados nos arts 44 e 45 da Lei 7/2005, de 29 de decembro, de presupostos xerais da Comunidade Autónoma de Galicia para o ano 2006, a sinatura do presente convenio suporá o consentimento expreso á Administración Autonómica, para incluír e facer públicos os datos refiridos ao presente acordo nos Rexistros de Convenios da Xunta de Galicia, polo que o Servizo Galego de Saúde dará publicidade deste acordo de conformidade co que establecen as disposicións aplicables na materia.

Segunda.- Criterios obxectivos de reparto.

O reparto dos fondos respostará á prioridade de dar continuidade aos programas existentes, e o importe da subvención a cada concello virá determinado polo cumprimento dos seguintes criterios, coa porcentaxe asignada sobre o total do importe deste convenio:

- Pola continuidade dos servizos municipais de atención a drogodependentes (UAD): 42,19%
- Por dispoñer de Unidade de Día: 25,33%.
- Por tratarse de grandes cidades pertencentes a áreas de elevado índice de risco absoluto de consumo de drogas, de conformidade cos estudos epidemiolóxicos realizados nos últimos anos en Galicia: 7,76 %.
- Pola dispoñibilidade de infraestruturas e instalacións independentes dos centros de saúde ou puntos de atención continuada: 19,17 %.
- Por contar a UAD cunha ubicación física estreitamente conectada con servizos de saúde mental do Servizo Galego de Saúde, que implica unha maior coordinación da asistencia dispensada: 1,05 %.
- Por ter a condición de centro transfronteirizo para a atención de trastornos adictivos: 0,42 %.
- Por outros factores sociosanitarios e valoración da evolución da demanda asistencial nos últimos anos, así como a adecuación ás terapéuticas baseadas na evidencia e a súa incidencia na prestación dos servizos: 4,08 %.

O importe resultante de aplicar a porcentaxe asignada a cada criterio repartirase entre os concellos que dispoñan de unidades que cumpran dito criterio.

Terceira.- Obrigas da Administración sanitaria da Comunidade Autónoma de Galicia.

A Administración sanitaria, a través dos seus orzamentos, colaborará cunha achega ingresada na conta da FEGAMP, que se destinará ao financiamento dos custos que supoña a realización dos proxectos, programas e axudas recollidos na cláusula primeira executados polos concellos de conformidade cos criterios anteriormente indicados e previos os informes técnicos pertinentes.

Para tal efecto, a colaboración coa FEGAMP establecerase a través da Subdirección Xeral de Planificación e Programación Asistencial (Dirección Xeral de Asistencia Sanitaria do Servizo Galego de Saúde).

Valorados os informes previstos neste convenio pola Comisión de seguimento, a adxudicación das axudas realizarase, mediante resolución do/a conselleiro/a de Sanidade, sen prexuízo da súa delegación de conformidade co previsto no artigo 9 da Lei 40/2015, do 1 de outubro, de novembro, de réxime xurídico do sector público, e no artigo 6 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Cuarta.- Obrigas da FEGAMP.

A FEGAMP como entidade colaboradora e representante única de todos os Concellos que dispoñen de servizos de atención sanitaria de trastornos adictivos, recibirá os fondos e transferiraos en nome e por conta da Xunta de Galicia aos concellos seleccionados, comprometéndose a facer constar expresamente a súa procedencia, así coma a finalidade do seu traspaso, de conformidade cos criterios anteriormente indicados e previos os informes técnicos pertinentes dos órganos indicados na cláusula precedente, que respectarán en todo caso os criterios obxectivos de reparto establecidos na cláusula segunda do presente convenio.

Ditos informes técnicos validaranse de conformidade co previsto na cláusula sétima deste convenio, e teranse en conta para a verificación do cumprimento do convenio no momento da xustificación, de conformidade co previsto na cláusula decimo primeira do mesmo.

Así mesmo, difundirá a actuación entre os concellos e os informará das condicións do convenio e do tipo de gastos para os que se realiza a transmisión dos fondos, asumindo as seguintes obrigas:

- a) Recadar as solicitudes e as adhesións dos concellos seleccionados e a aceptación das bases reguladoras contidas neste convenio, e facelas chegar ao departamento indicado na cláusula terceira. A adhesión e aceptación dos concellos deberá ser efectuada por escrito polo órgano competente.
- b) Publicitar e difundir entre os concellos interesados as liñas de axuda a que se refire o presente convenio.
- c) Remitir aos concellos os informes validados pola comisión de seguimento, de conformidade co previsto no presente convenio, e comunicar aos seleccionados a adxudicación das axudas, que se realizará mediante resolución do/a conselleiro/a de Sanidade, sen prexuízo da súa delegación de conformidade co previsto no artigo 9 da Lei 40/2015, do 1 de outubro, de réxime xurídico do sector público, e no artigo 6 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia..
- d) Entregar aos concellos seleccionados os fondos recibidos de acordo cos criterios e bases reguladoras establecidas no presente convenio.
- e) Comprobar o cumprimento e efectividade das condicións ou requisitos determinantes para o outorgamento das subvencións, así coma aportar a documentación xustificativa da realización das actividades e o cumprimento da finalidade que determinen a concesión ou o desfrute da subvención. Todo isto farase en base á documentación presentada polos concellos.
- f) Xustificar a entrega dos fondos percibidos ante o órgano concedente da subvención e entregar a xustificación presentada polos concellos.

- g) Someterse as actuacións de comprobación que, respecto da xestión de ditos fondos, poida efectuar o órgano concedente, así como calquera outras de comprobación e control financeiro de ditos fondos que poidan realizar os órganos de control competentes, tanto estatais coma comunitarios, aportando tanta información lle sexa requirida no exercicio das actuacións anteditas.
- h) Levar a cabo as labores de intermediación entre a Xunta de Galicia e os concellos intervinientes, cando así lle sexa solicitado.
- i) Remitir as oportunas certificacións e/ou informes municipais acreditativos do cumprimento dos programas desenvolvidos.
- j) Presentar as declaracións de axudas solicitadas ou concedidas en cada concello para a mesma finalidade e, en caso de non ter ningunha axuda, a presentación dunha declaración de que so se percibe este importe para esta finalidade.
- k) Colaborar no impulso de medidas de protección dos profesionais e dos centros sanitarios públicos, dentro do ámbito territorial dos concellos, fronte ás accións de violencia sanitaria dos usuarios, familiares ou acompañantes, en tanto que o Servizo Galego de Saúde serve aos cidadáns de ditos ámbitos, para o que se acordarán protocolos de cooperación entre as administracións sanitarias e os concellos da súa circunscrición. Entre as medidas a prever integraranse aquelas nas que deban intervir os corpos e forzas de seguridade do Estado, con competencias de ámbito local, para facer efectiva a protección e seguridade dos profesionais.
- l) Devolver os posibles remanentes das axudas concedidas antes do 31 de decembro de 2017.
- m) As demais obrigas previstas no convenio.

A FEGAMP, a quen se lle entregarán os fondos das axudas, distribuirá os mesmos segundo os informes técnicos a que se refire a presente cláusula.

Quinta.-Obrigas dos concellos que se adhiran ao presente convenio e acepten as bases nel contidas.

1. Os concellos que, previos os informes técnicos necesarios, accedan aos fondos a que se refire o presente convenio non poderán estar incursos en circunstancias determinadas no artigo 10 da Lei 9/2007 como excluíntes do acceso á condición de beneficiario.

2.- A realización dos programas levarase a cabo mediante os medios dispostos polos Concellos. Estes medios contarán coas debidas autorizacións, de conformidade co previsto na normativa sanitaria aplicable aos establecementos de tratamento de drogodependencias.

Os concellos incluídos no ámbito de aplicación do presente convenio que se adhiran e acepten as bases reguladoras contidas nel, asumen os seguintes compromisos:

- a) Cumprir as directrices e instrucións de coordinación e programación establecidas pola Consellería de Sanidade e polo Servizo Galego de Saúde
- b) Realizar os rexistros necesarios do historial do paciente de acordo coas instrucións do Servizo Galego de Saúde e conforme o disposto a Lei 3/2001, de 28 de maio, reguladora do consentimento informado e da historia clínica dos pacientes. Os profesionais sanitarios que precisen cumprimentar datos ou consultar a historia clínica electrónica utilizarán IANUS como principal ferramenta de traballo, sen prexuízo do uso de ferramentas informáticas específicas incluídas no catálogo corporativo e integradas neste.
- c) Manter a coordinación cos departamentos indicados na cláusula 3, así como cos servizos de psiquiatría e os responsables de saúde mental da área sanitaria.
- d) Co fin de acadar unha maior concienciación nesta materia por parte da cidadanía e de mellorar a formación dos profesionais implicados no tratamento destes pacientes, o equipo

asistencial colaborará no desenvolvemento e deseño do Plan Anual de Formación previsto no Plan de Trastornos Aditivos da Comunidade Autónoma.

e) Axustarse a lei de protección de datos e as instrucións e normativa sobre acceso á historia clínica do Servizo Galego de Saúde.

f) Cumprir os criterios de austeridade, eficiencia e oportunidade das actividades e gastos comprometidos.

g) Comunicar a delegación territorial da Consellería de Sanidade calquera modificación, suspensión ou vacante no cadro de persoal conforme a normativa vixente en materia de autorización de centros sanitarios.

h) Xustificar a través da FEGAMP o cumprimento dos requisitos e condicións, así como a realización da actividade e o cumprimento da finalidade que determinen a concesión ou desfrute dos fondos.

i) A participación do concello suporá o consentimento expreso dos interesados á administración para incluír e facer públicos os datos referidos ao convenio nos rexistros públicos da Xunta de Galicia, creados nos artigos 44 e 45 da lei 7/2005, do 29 de novembro e Decreto 126/2006, do 20 de xullo.

j) Facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas, no exercicio das súas funcións de fiscalización e control do destino das subvencións

3. Ademais, os concellos comprométense ao cumprimento das obrigas establecidas no artigo 11 da Lei 9/2007, de subvencións de Galicia.

4.-O asinamento deste convenio non implica relación laboral, contractual ou de calquera outra índole entre os profesionais que vaian desenvolver as actividades previstas no mesmo e a Xunta de Galicia, de tal xeito que a esta non se lle poderá esixir responsabilidade ningunha, nin directa, nin subsidiaria, polos actos ou feitos acaecidos no desenvolvemento do convenio.

Sexta.- Finalidade das axudas para Unidades asistenciais de drogodependencias (UADs).

Servirán para levar a cabo o desenvolvemento dos programas de asistencia a persoas con trastornos adictivos, a través das unidades que atenderán a demanda que se xere neste período respectando os principios de universalidade, anonimato, voluntariedade, equidade e gratuidade.

Dita atención comprenderá, entre outras, as funcións de prescrición e procedementos diagnósticos e terapéuticos, rehabilitación en pacientes con déficit funcional recuperable, a educación para a saúde no seu ámbito de actuación e a realización das prestacións sociosanitarias que correspondan con este nivel de asistencia en coordinación co sistema de servizos sociais.

A intervención de asistencia sanitaria e atención aos trastornos adictivos farase a través das Unidades Asistenciais de Drogodependencias (UAD) das que dispoñan os Concellos. Ditas Unidades dependerán tanto xurídica como organicamente do ente local e en ningún caso terán vínculo laboral coa Xunta de Galicia.

Sétima.- Comisión de seguimento.

Para o seguimento e coordinación das accións previstas no presente convenio en canto a relación entre a administración autonómica e a FEGAMP, créase unha Comisión de seguimento composta por un representante da Consellería de Sanidade, dous representantes do Servizo Galego de Saúde, un representante da Vicepresidencia e Consellería de Presidencia, Administracións Públicas e Xustiza, e catro representantes da FEGAMP. Os representantes designados polas consellerías e o Servizo Galego de Saúde terán, como mínimo, rango de xefe/a de sección. Un dos

representantes pola Xunta de Galicia presidirá a comisión, e dirimirá co seu voto os eventuais empates que poidan producirse.

Son funcións desta comisión de seguimento:

- Velar polo cumprimento do convenio.
- Valorar os informes técnicos previstos nas cláusulas terceira e cuarta do presente convenio, e comprobar e garantir a súa correspondencia cos criterios obxectivos determinados na cláusula segunda, con carácter previo ao libramento dos fondos conveniados.
- Propoñer as medidas necesarias para garantir o exercicio coordinado das actuacións previstas no convenio
- Propoñer as solucións das posibles controversias que puideran xurdir en relación ao convenio.
- En xeral, as que o artigo 49 f) da Lei 40/2015, do 1 de outubro, de réxime xurídico dos sector público lle atribúe aos mecanismos de seguimento, vixilancia e control da execución dos convenios.

Como mecanismo individual de seguimento e coordinación das accións previstas no presente convenio, en canto as actuacións derivadas das relacións entre a administración autonómica e cada concello que se adhira ao mesmo e acepte as bases reguladoras contidas nel, poderase crear unha Comisión técnica de seguimento composta por dous representantes da Administración sanitaria, un representante do concello e un representante da FEGAMP. As funcións desta Comisión técnica serán:

- Velar polo cumprimento do convenio no que se refire as relacións entre a administración autonómica e o concello que acceda aos fondos previstos neste convenio.
- Propoñer as medidas necesarias para garantir o exercicio coordinado das competencias de cada unha das partes.
- Propoñer as solucións das posibles controversias que puideran xurdir en relación ao convenio.

Oitava.- Achegas económicas.

A Xunta de Galicia contribuirá ao financiamento das actividades comprendidas no obxecto deste convenio, cun importe total de TRES MILLÓNS NOVECIENTOS SETENTA E NOVE MIL SETECENTOS NOVENTA E NOVE EUROS CON NOVENTA E DOUS CÉNTIMOS (3.979.799,92 €), con cargo á aplicación orzamentaria 5001.413A.460.0 dos orzamentos xerais da Comunidade Autónoma de Galicia, tanto no referente ao importe a satisfacer no exercicio 2018 coma 2019. O importe a satisfacer no exercicio 2018 ascenderá a 2.618.403,78 € (65,8% do total) , e a cantidade restante, que ascende a 1.361.396,14 € (34,2% do total), satisfacerase no ano 2019. De conformidade co artigo 26.2 do Decreto 11/2009, dita distribución atenderá ao momento en que se prevexa realizar o gasto derivado das subvencións que se concedan.

Cada Concello, previos os informes técnicos previstos, recibirá un importe global e único para os programas que desenvolva.

No caso de que se produza un incremento de crédito derivado dunha xeración, ampliación ou incorporación, poderase elaborar unha addenda para a ampliación deste convenio formalizando así o libramento da contía correspondente.

Novena.- Período de entrega dos fondos a FEGAMP.

A FEGAMP, como entidade colaboradora, recibirá os fondos correspondentes na medida e coa antelación necesaria para facilitarlle os pagamentos aos concellos seleccionados, de conformidade co indicado na cláusula seguinte.

Ata a súa entrega aos beneficiarios, os fondos entregados a FEGAMP consideraranse en depósito e en ningún caso esta considerará os fondos recibidos como integrantes do seu patrimonio nin do seu orzamento, nin poderán ser obxecto de retención ou minoración, e deberán ser obxecto de contabilización separada.

A FEGAMP levará os rexistros contables debidos para facilitar a axeitada xustificación da subvención e a comprobación do cumprimento das condicións establecidas.

Unha vez recibidos os fondos pola FEGAMP, esta transferirá aos concellos seleccionados a cantidade que lle corresponda de conformidade cos informes técnicos previamente elaborados, no prazo máximo de 30 días dende a súa recepción.

A FEGAMP acreditará ante as entidades asinantes a entrega dos fondos aos concellos seleccionados mediante xustificante de pagamentos válidos (extractos ou certificación bancaria debidamente identificados).

Décima.- Libramento de fondos aos concellos.

O libramento dos fondos realizarase mediante un anticipo máximo do 65,8% do importe da subvención concedida (2.618,403,78 €), trala firma do presente convenio, previa autorización do Consello da Xunta de Galicia de conformidade co previsto no artigo 63.Dous.3 do Decreto 11/2009, do 8 de xaneiro, polo que se aproba o regulamento da Ley de subvencións de Galicia.

De conformidade co previsto no artigo 65.4 do Decreto 11/2009, polo que se aproba o regulamento da Lei de subvencións de Galicia, o anticipo queda exonerado da constitución de garantía.

O importe restante non se fará efectivo ata que estea integramente xustificada a totalidade dos gastos correspondentes as actividades conveniadas incluíndo o anticipo indicado anteriormente, e unha vez presentada a memoria final por parte do responsable do proxecto, e á vista do informe de conformidade realizado polo órgano competente.

Décimo Primeira.- Gastos subvencionables e xustificación.

En canto aos gastos subvencionables atenderase ao disposto no artigo 29 da Lei 9/2007, de subvencións de Galicia. Consideraranse gastos subvencionables aqueles que de xeito indubidable respondan á natureza das actividades que se realicen no período comprendido entre o 1 de xaneiro de 2018 e o 31 de decembro de 2018.

Para os efectos do previsto no artigo 46 e seguintes do Decreto 11/2009, os concellos presentarán os documentos xustificativos que de seguido se citan, e acreditarán expresamente o destino e importe dos gastos efectivamente realizados con cargo a cada programa ou axuda, detallando os gastos de persoal.

Nos termos recollidos nos artigos 28 a 30 da Lei 9/2007, do 13 de xuño, de subvencións de Galicia, así como nos artigos 41 e 42 do Decreto 11/2009, do 8 de xaneiro, polo que se aproba o

Regulamento da Lei 9/2007 do 13 de xuño de subvencións de Galicia a xustificación por cada concello do cumprimento das condicións impostas e da consecución dos obxectivos previstos, consistirá na certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a que ten sido concedida.

No certificado antes mencionado debe constar que o importe do anticipo foi efectivamente pagado pola entidade local perceptora con anterioridade á finalización do período de xustificación. Con respecto ó resto do importe xustificado, para que se poida considerar subvencionable deberá constar como contabilizada a fase de recoñecemento das correspondentes obrigas.

Cando as actividades teñan sido financiadas, ademais de coa subvención, con fondos propios ou outras subvencións ou recursos, acreditarase na xustificación o importe, procedencia e aplicación de tales fondos ás actividades.

Tamen será necesario presentar documentación acreditativa da conta de resultados na que se detallen os gastos de persoal e outros gastos derivados da realización do programa subvencionado, como, por exemplo, material de oficina, traballos realizados por outras empresas, material sanitario, etc. Como mínimo o 80% do importe xustificado debera corresponder a gastos de persoal. No caso de que algún concello non acadase a porcentaxe indicada, a cantidade asignada reducirase no importe correspondente á porcentaxe non cuberta por ese concepto.

Así mesmo, no caso de programas de asistencia a trastornos adictivos deberán presentar unha memoria descritiva breve da actividade realizada, así como cumprimentar os datos esixidos polos instrumentos de planificación vixentes en materia de drogodependencias e asistencia sanitaria.

En todo caso, as entidades asinantes resérvanse o dereito de solicitar tanta documentación consideren precisa, en relación coa xustificación dos gastos.

Esta documentación presentarse ante a FEGAMP, que comprobara a acreditación do cumprimento e efectividade das condicións e requisitos determinantes para o outorgamento das subvencións, así como a realización da actividade e o cumprimento da finalidade que determinen a concesión dos fondos, con base na documentación presentada polos concellos seleccionados.

A FEGAMP entregará a xustificación presentada ao departamento indicado na cláusula terceira do presente convenio, acompañando certificación do secretario da Federación co Visto e prace do seu Presidente, do cumprimento do obxecto do presente convenio, baseada nas certificacións anteriores.

A documentación xustificativa descrita nesta cláusula deberá estar en poder da Consellería de Sanidade e do Servizo Galego de Saúde, a máis tardar o 15 de marzo de 2019.

Con base na indicada documentación, o órgano indicado na cláusula terceira do presente convenio levará a cabo a comprobación da xustificación documental e emitirá certificación acreditativa do cumprimento das actuacións previstas no convenio.

A Xunta de Galicia, a través dos seus servizos técnicos, resérvase a facultade de realizar as inspeccións e comprobacións que considere necesarias co fin de asegurar o cumprimento das normas e requisitos cos que se concede esta axuda.

Décimo segunda- Causas de resolución.

Sen prexuízo das causas de reintegro previstas no Título II da Lei 9/2007, de subvencións de Galicia, son causas de resolución do presente convenio:

- O incumprimento total ou parcial de calquera das súas cláusulas ou das obrigas recollidas neste convenio dará lugar ao reintegro total ou parcial das axudas recibidas e o xuro de demora correspondente de acordo co establecido no Art. 33 da Lei 9/2007, do 13 de xuño de subvencións de Galicia, e nos artigos 74 e seguintes do Decreto 11/2009, polo que se aproba o seu regulamento.
- A aplicación dos fondos outorgados a fins distintos dos que motivaron a súa concesión.
- O mutuo acordo das partes asinantes.
- A introdución de modificacións nas directrices dos programas a desenvolver, sen contar coa previa autorización escrita da Administración sanitaria.
- A denuncia de calquera das partes asinantes, sempre que o notifique ás outras con dous meses de antelación a data de finalización da vixencia do convenio.

Toda alteración das condicións tidas en conta para a concesión destas axudas, e en todo caso a obtención de subvencións ou axudas outorgadas por outras administracións, entes públicos ou privados, poderá dar lugar, se con isto se alterasen os obxectivos deste convenio, á modificación dos importes das axudas.

Décimo terceira.- Xurisdición e normativa aplicable.

O presente convenio de colaboración ten natureza administrativa. As dúbidas que se presenten na súa interpretación e execución serán resoltas pola Comisión de seguimento. As partes quedan suxeitas á xurisdición contencioso-administrativa para a resolución de calquera conflito que puidera xurdir na aplicación do mesmo.

En todo o non disposto neste convenio será de aplicación a Lei 9/2007, do 13 de xuño de subvencións de Galicia, o decreto 11/2009 de 8 de xaneiro, polo que se aproba o Regulamento da lei 9/2007 do 13 de xuño e en canto non se opoña ao establecido na dita Lei, a Lei 38/2003, de 17 de novembro, xeral de subvencións e o Decreto 193/2011, do 6 de outubro, sobre subvencións a entidades locais galegas, e demais normativa de desenvolvemento, en canto lle sexa de aplicación.

Décimo cuarta.-Vixencia.

O presente convenio estenderá a súa vixencia dende a súa sinatura e ata o 31 de marzo de 2019. O período subvencionable será o previsto na cláusula décimo primeira deste convenio. A data límite para presentar a documentación xustificativa á FEGAMP (gasto e actividades) será o 2 de marzo de 2018.

En proba de conformidade, as partes asinan por cuadriplicado na data e lugar ó inicio mencionados.

Pola Vicepresidencia e Consellería de Presidencia, Administracións. Públicas e Xustiza	Pola Consellería de Sanidade e Servizo Galego de Saúde	Pola Federación Galega de Municipios e Provincias
Alfonso Rueda Valenzuela	Jesús Vázquez Almuíña	Alfredo L. García Rodríguez

